



Anwar bersama pemenang Pertandingan Akhir Bahas Piala Perdana Menteri ke-50 Tahun 2025 di Pusat Konvensyen Antarabangsa Putrajaya (PICC), semalam.

(Foto BERNAMA)

Contohi sikap peserta Pertandingan Bahas Piala Perdana Menteri

BERITA HARIAN 27 JUL 2025 mjd:2

Putrajaya: Datuk Seri Anwar Ibrahim meminta Ahli Parlimen menerapkan budaya berbahas secara beradab dan sopan di Dewan Rakyat tanpa perlu menghina atau memaki hamun.

Mengambil contoh peserta Pertandingan Akhir Bahas Piala Perdana Menteri ke-50 2025 yang berbahas dengan fasih, berani, bijak mengolah fakta serta berhujah secara berhemah, Perdana Menteri berkata kaedah itu boleh dicontohi Ahli Parlimen ketika berbahas di Dewan Rakyat.

Katanya, perbahasan bukan sekadar kepintaran berbicara tetapi ia juga membabitkan ke-

upayaan menguasai, menelaah, menghadam isu sebelum dan melontarkan pendapat dan idea.

“Yang kedua yang terkait adalah perbicaraan dengan mempertahankan bahasa dan budaya yang sopan tetapi tegas, tidak menghina, tidak mencaci. Ini yang disebut adab dan akhlak.

“Dan ini ditunjukkan oleh anak-anak pembahas tadi, yang (boleh) dipelajari oleh Ahli Parlimen Malaysia.

“Maknanya, kita boleh berbeza pendapat dan boleh tegas dalam berbeza pendapat. Dan boleh tegas dalam menyampaikan hujah, melontarkan idea tapi ti-

dak semestinya (dengan) cara menghina, mengaibkan, mencaci dan maki hamun.

“Apalagi kalau guna lambang dan label Islam untuk pertahanan,” katanya ketika merasmikan pertandingan itu.

Yang turut hadir, Menteri Pendidikan, Fadhlina Sidek dan Timbalan Menteri Peralihan Tenaga dan Transformasi Air, Akmal Nasrullah Mohd Nasir.

Anwar yang juga Menteri Kewangan turut memuji generasi pelajar kini yang menunjukkan penguasaan bahasa Melayu yang tinggi serta berbahas dengan penuh ilmu dan kefahaman.

Perdana Menteri berkata, nilai

adab dan akhlak perlu menjadi sebahagian daripada pendidikan negara kerana pembinaan negara MADANI tidak boleh hanya bergantung pada kemajuan teknologi seperti AI (kecerdasan buatan), digital dan teknologi baharu semata-mata.

“Dan apabila kita berbicara soal negara MADANI, ia mesti diterapkan dengan asas nilai dan akhlak, sebagaimana diungkapkan oleh Sheikh Taha Jabir Al-Alwani dalam karya beliau (*Adab al-Ikhtilaf*),” kata Anwar.

Mengakui cabaran semasa yang kompleks dan memerlukan generasi masa depan memahami dan menguasai ilmu baharu,

Perdana Menteri berkata, pengadaptasian ilmu baharu mesti berpaksikan akar tradisi, nilai kemanusiaan dan akhlak.

“Kita latih anak-anak bukan sahaja untuk menguasai ilmu baharu tetapi juga untuk mempertahankan nilai akidah, akhlak dan nilai seni budaya tempatan. Tanpa adunan ini, kita hanya memenuhi acuan negara Barat,” katanya.

Pertandingan edisi ke-50 itu menyaksikan Sekolah Menengah Agama Persekutuan Kajang muncul johan bagi kategori Bahasa Melayu manakala Sekolah Sultan Alam Shah menjuarai kategori Bahasa Inggeris.